




Progettù:

“TARRANÓA E TERRANOIA”

Finanziatu da la Regioni Saldigna cu' la Legghji 482 di lu 1999, alticculi 9 e 15 e da la Legghji Regionali 22 di lu 2018. Annualità 2022.

La dì 13 di Friàgghju venarà inaugurata la mustra “Intrecci” illu Refettoriu d'Arte

Pubblicatu la dì 11 di Friàggju 2023 • Bandiu pa' la stampa



La dì 13 di Friàgghju, in luni, lu Refettoriu d'Arte, chi s'agàtta illa stritta di la Refezioni, venarà turratu a abbrì pa' la mustra collettiva “Intrecci”. Pa' cinqu dì si podarà vidé lu chi àni fattu sei artisti di lu lócu, e si podarà piddhà palti a la cilca di dinà pa' lu Centru di Salutu Mentali (Centro di Salute Mentale - CSM) di Tarranóa, sigutu da la dutt. Luisa Budroni. L'obiettivu di lu progettù è di cumparà tuttu lu chi selvi pa' fà un murale illa residenza d'assistenza chi s'agàtta in carréra Baronia.

L'abbaltura di la mustra è appustata pa' luni a li cincu di sirintina. L'opári di B, Luca Secchi, Mozok, Lisa Fancello, Manuela Carboni e Andria Austinu Dalias si pódarani figghjulà finz'a la dì 17 di Friàgghju, in vennari, da li deci e mezu di matinata a l'una (10:30-13:00) e da li cattru a li setti di la sera (16:00-19:00). L'ulganizzazioni è siguta da l'associazioni di prummuzioni suziali Omnia, insempi a l'Asl Gaddhura. L'associazioni da umbè d'anni trabaddha pa' fà attivitài di inclusioni e integrazioni suziali. Lu Cumuni di Tarranóa à patrucinatu lu progèttu.

“È un progèttu chi àuni diffarenti istituzioni e figuri professionali, palchì candu si tratta di salutu mentali è impultanti agghjutassi e trabaddhà insempi pa' punì in prattica l'obiettivi”, dici la dutt. Emanuela Angioni, Ingarrigata di lu Centru Riabilitativu Psichiaticu addidì di lu CSM di Tarranóa. “In chistu casu lu progèttu à doppiu 'alóri: pa' mezu di l'esposizioni di l'opári 'ulèmu fraicà altu arte. Chissu chi aremu a rici selvarà pa' cumparà lu chi chi selvì a pintà un murale, fendi a nou un lócu cundivisu (condiviso) e appustendi un mumentu di socialitài pa' faiddhà, pa' fà trabaddhi manuali, pa' mustrà li proppi cunniscenzi di progettazioni, pianificazioni e di trabaddhu insempi. Chistu progèttu – sighi la dutt. Angioni – faci bè a lu salutu mentali di la passona, palchì agghjuta li capacitài espressivi, dà valori a la só' competenza, sviluppigghja diffarenti abilitài e l'autostima. Ringrazigghju lu Cumuni, l'associazioni Omnia, la biblioteca cumunali, l'artisti e l'educatrici professionali di lu Centru abbaltu addidì, li dutt. Sara Bernardini e Sonia Sanna chi àni trabaddhatu pa' fà chistu progèttu. Spiremu chi l'opári venghini 'isti da tanti passoni, pa' dà mirétu a l'artisti e accapità li dinà chi selvini”.

“L'arte è un mezu pa' mustrassi, una lingua chi ci àuni, un'ispirazioni pa' l'artista e pa' ca' la 'idi – à dittu l'assessori a la cultura Sabrina Serra -. Pa' chistu, una mustra d'arte è sempri un'esperienza chi dà sintimèntu, e in chistu casu ancóra di più. Sustinìmu chistu progèttu palchì cridìmu avveru illa só' impultanzia e li só' 'alóri suziali e culturali”.